


## 1806 - Cunvegnientscha cun Tschamut

L'Alp Tschamut, en possess mo dils vischins da Tschamut, ha adina puspei caschunau malaveglias denter ils vischins digl uclaun. Meinsvart empruavan vischins da buca setener vid las directivas el document digl onn 1398. Avon il mistral dalla Cadi ein las duas partidas danovamein secunvegnidas e formulau da niev ina cunvegnientscha cun sis puncts ligionts per tuts vischins. Il pagar igl arvè deva adina puspei da discutir e dispitar ed ins ei secunveggni da reparter quel tenor ils praus ed èrs ch'ils vischins possedeavan a Tschamut.

### Cunvegnientscha ch'era daventada a Mustér igl onn 1806 denter ils vischins da Tschamut



Anno 1806, ils 7 da schaner, han vischins da **Tschamut** cun il pli, serrau giu da prender si per quest onn s.h. biestga per cargar lur alp per 8 fl. per fiug. Il Toni Schmet, statalter Gaudios Riedi e Clau Sievi, vesend che quella conclusiun mava directamein encunter il da vegl enneu stabilisau possess, il qual fuva zuar da prender si cul pli dil vischinadi gl'interess, aber igl arvè vegneva adina partius suenter las s.h. vaccas che vischins envernavan sin lur territori dil vischinadi, han secuntermess ed opponiu encunter, sefundond sin il ruasseivel possess e la brev d'anno 1398, la quala deva clamein d'entellir, aschinavon che quella deva ils dretgs alla venerabla claustra, en munconza ch'ei vegness buca dau igl arvè en quella fixaus, da puder en qual clavau che ad ella plaschess leu **Tschamut** e sefar pagada vid la flur en quel, ni quels clavaus, che quels praus directamein fussen sco hipoteca da quei arvè, ed aschia per naturala consequenza duess igl interess, il qual vegneva recuvraus da vischins ord quella alp u restar tier la veglia izonza da purtar suenter las s.h. vaccas; u silmeins a proporziun da praus ed èrs, sco mintga vischin posseda.

Dapia che la pluralitad da vischins insisteva sin sia conclusiun fatga e pretendeva da puder far quella ed


autras a siu plascher; il Toni Schmet aber ed ils auters dus, manegiond che quei fuss ad els da memia grond pregiudeci dapi ch'els presentamein possedeavan a proporziun da vischins pli s.h. vaccas ed era praus ed èrs, ch'ils auters vischins han schau cumandar la pluralitad da vischins da rispunder avon dretg ton per annullar la resoluziun prida ils 7 da schaner da prender si s.h. biestga per ils 8 flurins per fiug, sco era per obtener entras sentenzia ina tschuncada per adina en vesta dalla meldigiada brev da concluder enzatgei che pudess ira encunter il vegl possess e la brev etc.

Per quella fuvan omisduas parts secumparidas e provididas cun lur ugaus, documents oz cheu en **Mustér** per finir cun dretg questa fatschenta considerond aber che, sche quei vegneva entschiet cun dretg, quei havess dau ora ina zun spendiusa dispeta, la quala havess schendrau in cuzzeivel hass e malaveglias denter quels paucs vischins, sco era ch'il cuors dil mund seigi, che oz ei in empau pli ferm e damaun in auter e per pli raschuns, sche han els perinamein desistiu dil dretg e concludiu e serrau giu ina cunvegnientscha adequata cun la brev veglia, la quala duei restar en kraft per adina, taluisa che dacheudenvi ni ils paucs ni ils biars dils vischins possien zatgei midar da quella sut negin tetel ni pretext, la quala ei sco suonda.

1. Deigi la grevezia digl arvè, baghetgs e tuttas autras che pon ira vid l'alp vegnir partidas giu e purtadas suenter ils praus ed èrs che vischins
2. possedan leu **Tschamut** e per consequenza deigien era igl interess vegnir partius e possediis suenter praus ed èrs, quei ei sch'ei vegn schau via, ni priu si s.h. tiers.
3. Deigi scadin vischin, quei ei mintga fiug, puder tener a casa ina s.h. vacca, sch'el ha agen envernau per mulscher, sco adina ei usitau e dapli deigi el aunc puder prender si ina schetga ni da mulscher ed era tener a casa.
4. Possi scadin vischin era metter tut ils auters ses tiers e guder l'alp.
5. Deigi mintga vischin aunc puder prender si annualmein in vadi ni in stierl, ni stiarla; il rest deigi vegnir cargau l'alp e partiu sco ei detg el secund artechel cheu sura; e quei vadi ni stierl duei vegnir cargaus ell'alp nua ch'ei cargan lur atgna biestga schetga.
6. Dil rest, ton da cargar ad alp, ni guder mintgin ses tiers dapersei a siu plascher, sco era guder l'alp cun prender si tiers jasters, bein aber adina mo sco ei po purtar, ni schar via ch'els vessen davonz per lur biestga duei adina puder vegnir concludiu cun il pli da vischins, nua scadin vischin deigi puder dar siu meini.

E quei ei daventau en **Mustér**, ils 21 da matg anno 1806 e per confirmaziun da quei suttascrivin nus per cumissiun ed en preschientscha dils cheutier deputai da **Tschamut** Tomas Berther sco ugau ed en num da Toni Schmet.

Enten num dalla pluralitad da l'otra vart sco ugau Gion Antoni Schmet



**Tschamut**

## 1806 - Igl arver en natira – brev dils 15 da schaner 1806

*Cun quella brev alla vischnaunca da Tujetsch supplichescha pader Basilius Veith dalla claustra da Mustér, da pagar igl arvè en naturalia e quei cuagl argument da buca „dar caschun tier inconvegnietschas e cheutras sefar particepsiels dil mal“.*

### Alla ludeivla vischnaunca da Tujetsch

La proposiziun fatga da monsignur avat il di da Silvester, en num dalla ludeivla vischnaunca da **Tujetsch** entras il bein sabi signur mistral *Gion Antoni* Gieriet e signur statalter Mucli, ei vegnida mess avon ad in venerabel capetel dalla Casa da Diu, il qual suenter ver madiramein reflectau sur tala nova proposiziun, en consequenza dalla quala ei vegness buca cargau ad alp en general, ha viu en che tenor exprienza massi quei en pregiudezi dallas olmas, sco ins era da quei avisaus buca mo dad in u l'auter spiritual, sunder er'ina gada d'in entir venerabel capetel dils pasturs dallas olmas staus admonius cun entardar ni tralaschar il survetsch da Diu dumengias e firaus, nua che nies stan spiritual laschi buca tier da concuorer ni cooperar leutier entras novas cunvenziuns che gidassen tier tal intent.

Sche ha in venerabel capetel concludiu buca per siu interess, sonder per buca dar caschun tier talas inconvegnietschas e cheutras sefar particepsiels dil mal, da reservar il temps ad uras da consultar ses pli aults superius e prender giu da maun da quels en tgei e con lunsch ins sepossi schar en a siu temps e denton garegiar dalla ludeivla vischnaunca il sulet arvè en natira suenter dretg diever ed instrument cun rugar ed augurar, ch'igl altissim Diu vegli era quest onn dar sia grazia e benedicziun sin tuttas alps e schurmegiar igl onn vegnent il s.h. muvel da tut mal e dils tiers nuscheivels, sco el ha preservau gl'onni vargau.

Actum Die et Anno ut supra  
P. Basilius Veith Cap. Secret.

Acta Capitularia 1799-1813, pag. 95 e 96. (Notizia da pader Baseli Berther)



## 1808 - Lavina a Selva

*Igl ei ils 13 da december 1808, la neiv schai in um aulta ed ins temeva oravontut la lavina giu dalla spunda encunter mesanotg. Ils biars secasan la notg ellas casas giudem il vitg. La lavina dalla Val Ruinatsch vegneva giu onn per onn e purtava empau puorla da neiv si el vitg. Mo quella notg ei tut auter. La lavina dalla Val Ruinatsch vegn cun sgarscheivla forza e vehemenza enviers il vitg e s'unnescha lu aunc cun quella dils Vanauls. La destrucziun ei horrenta. Sonda, ils 17 da december, vegnan 19 baras satradas e la dumengia las ulteriuras 6 unfrendas. La descripziun dalla disgrazia entras pader Placi a Spescha lai sentir profundamein la paupra situaziun a Selva.*

### “Unglück von Selva im 13ten Tag des Christmonats 1808”

da pader Placi a Spescha

**Selva**, il secund davos liug dalla **Val Tujetsch** ella **Cadi**, schai odem in plaun-paliu e buca lunsch naven dallas fontaunas dil **Rein Anterior**. - Siu num deriva dil vegl retic, che vul dir: uaul (selva) e vegn aunc oz numnaus dals Uranes tudestgai: „**Zum Holz**“, pertgei quei vitget era baghiaus egl uaul. - Il vitg da **Selva**, ch'era strusch serefatgs dapi il barschament da 1785 e ch'era dapi lu vegnius baghiaus tut da niev, veva ussa 13 casas-lenn e gest tons clavaus cun buns nuegls. Il vitget schischeva silla riva settentriunala dil **Rein** sin in rieven; el possedeava surasiviars in trit e rar uaulet. **Selva** ei in beneficiat cun baselgia.

Da neueneu ei il vitget staus smanatschus da duas lavinas; d'ina encunter mesanotg e da l'otra encunter miezdi, da surengiu e da sutensi. Quella dil **Rein** sutensi stremblava e spurlava si il vitg bunamein onn per onn; ella tementava ils vischins e schizun sdernava per tiara quels che vegnevan memia datier; vargava denton il pli savens senza caschunar pli gronds donns che rumper en finiastras, derscher entuorn chischners e scarplir las slondas dils tetgs. - Quella dalla **Val dil Plaun** encuntercomi, quella da surengiu, mava savens cun baghetgs, cuvrevia vi gliued e biestga e quei malgrad ils cugns-crap construi sur ils baghetgs per rumper la lavina, sco igl ei era stau il cass avon dus onns (1806).

Ins sperava denton silla protecziun da Diu ed essend ch'ei deva gest el liug dil vitg ina bun'aua, bunas pastiras e tut il cumadeivel per in'esistenza da gliued e biestga, cartevan ins d'astgar viver en prighel.

Gliez unviern era la neiv in um aulta; ei suflava e cuflava senza fin e misericordia. Stgirezia e sclaridas anetgas sebrattavan giu e la fin finala fageva ei ton da selvadi, ch'ils habitonts han buca ughiau da semuentar ord casa quella sera, gnanc da perver e buentar. Ei schabegia schiglioc buca darar, cunzun a **Tschamut**, ch'ei sufla e cufla aschi vehement, che las cuflas, pugnond ina cuna l'otra, petgan fiug. Mo quella sera fagev'ei tondanavon, che tgi che leva buca stenscher e vegnir tschocs, steva a casia. La lavina meridiunala, che schulava giud las **Palas dil Ruinatsch** e vegneva giu bunamein onn per onn, temevan ils da **Selva** buca quellas caussas, ed ein per quei motiv fugi lezza sera ellas casas giudem il vitg, ch'eran bein pli maneivel da quella, mo pli allontanadas dalla lavina sura, settentriunala.

Per carezia e quitaun pil beneficiat dil liug, sur Peter Weller, han ils vischins supplicau el da vegnir cun els; el sappi gie bein aunc seregurdar, ch'avon dus onns, la lavina hagi cuvretg sia casa, la baselgia e sfraccou la casa vischina. El ha denton snegau quei beinmanegiau invit e replicau zun modest a sias nuorsas: La divina providientscha hagi destinau quella casa per el; el sappi subir il prighel cun ses vischins e banduni buca siu post.

Tgei sgarschur e stgiraglia notg; ils suffels burlevan e scadenavan cun vehemenza encunter las casas; talmein, che la cufla sefuritgava dalla pli stretga ruosn'en. Ei veva dau las dudisch e stuschava encunter l'ina dalla notg. Ils vischins eran tgi iu a letg, tgi scheva rusari, tgi vegliava -

che la disgrazia ei stada cheu!

La zun extendida, profunda e teissa **Val Ruinatsch** sedestacca e sesfuola cun vehemenza giuadora - e cun quella era l'aschinumada lavina da **Benaus** (*Vanauls*)! Omisduas sederschan giuadora cun stermentusa ramur, entochen giuaden el **Rein**, e leu s'entupond cun forza e sfraccass nundescribibil, sesiettan ellas burlend ed urlond dil rieven **Rein** siadora. La davosa dat ina menada nunspitgada all'emprema, enviers mesanotg per liung ora; ellas contonschan domisduas il **Plaun** e sederschan cun vehemenza sul vitg en. Semanond ell'ussa aunc dalla vart meridiunala suranora, ei la catastrofa cumpleta. Tut quei ch'ei en via va en scalgias e vegn el medem temps satrau. La tschaguola dalla tuor-baselgia e la crusch sgolan tras l'aria ensemblamein cun slondas e tetgals, che vegnan purtai entochen si egl uaulet sur il vitg. Sis casas ein sfraccadas ensemen diltuttatfatg; ina ei donnegiada ed in'otra ha buca fastitg da tetg pli. Tschun clavaus ein destrui radicalmein e ston vegnir baghiai da niev dil sulom alla crusch-spitg; dus sulets ein restai senza donn. 42 persunas, pia la mesadad dils habitonts ed in affon aunc buca naschiu, 37 armauls e circa 200 tiers manedels ein satrai sut la neiv e las ruinas dils baghetgs.

Il beneficiat cuora immediat giuadora, va vin baselgia e tucca il zenn da stuornas; quei um spir forza e vertit, che fa bunamein miraclas per liberar sias nuorsas satradas vivas!

Ils Tschamuters che han udiu il rumplanem ed il zenn da stuornas, cuoran sut agen prighel da veta atras l'altezia nevada ed ein ils emprems silla piazza da disgrazia. Mo tgei ston els veser immediat? Treis da lur vischins cun biestga e tut sturni per plaun e senza enzenna da veta.

Plirs umens da **Selva** pervesevan lur muvels sillas aclas da **Caspausa**, ina mes'ura sur **Selva** encunter mesanotg ed han udiu nuot. Per l'auter di la damaun han ins pudiu dar sinzur ad els e scochemai ein ei curri tras las nevas dallas plauncas teissas neu encunter **Selva**, senza schar dar el tgau, ch'era els pudessen mintga mument vegnir satrai dalla lavina. Il medem di, che fuv'ina mesjamna, ei il plevon dalla **Val Tujetsch**, sur Luregn Schmed, cun tschuppel umens da leuora, semess sin via encunter **Selva**, mo essend la via stuppada ed aunc adina periclitada dad ulteriuras lavinas, ha er'el stuii ir a **Caspausa**, e per la medema via dils perveseders eis el finalmein arrivaus a **Selva** plein quita e premura per sias paupras nuorsas. El era in um grev da sisonta onns e suava tut en in'aua, sco dis da stad ella pli gronda calira. Treis umens ed in mattatsch han pudiu sedeliberar da sesez ord la lavina; 13 persunas ein vegnidas excavadas vivas e buca fetg donnegiadas; las autras han ins anflau mortas. Rest Giusep Riedi, in um sil meglier e sia entira famiglia han stuii passentar 15 uras sut neiv e crappa e senza saver magliar la minima caussa. El era mo en camischa. Els fagevan oraziun, seconsolavan, grevan ed udevan in l'auter bein e scoiada, schebi separai in da l'auter. Plaunsiu han ins udiu lur vuschs, grend tuts el tact tgei ch'ei mo pudevan - ed els sezs en lur fossa udevan uss era ils cavaders. Ed uss han ins entschiet a cavar, mo vonzeivi ein ins stai necessitai da schar ira giuden ina resgia vid in sughet, sinaquei ch'il cau-casa sappi gidar a trer ella per arver ina ruosna, ch'ei possien siadora.

La tradiziun raquenta, ch'in buobet muncavi aunc; ins ha clamau el pil num epi hagi ei rispundiu frestgamein: „Ju sun ain pegna æd a tgaud æ bien!" Il buf veva pia bess il plat-pegna pli lunsch ed il pign che durmeva sin quella, ei daus lien - e nuota schelaus!

Gion de Plaz, in um da sisonta onns, zugliaus mo en in lenziel, ha luvrau uras ora ella neiv per liberar sesez e sia dunna, mo ha tuttina stuii schar schelar ella. Anflond el miezmorts, tut steris e senza vusch, semigliants ad in moribund, han ins purtau el en sia stiva caulda, scaldau si las solas-pei cun plattas-crap bunamein burnidas, epi eis el puspei vegnius neu e vivius. Naven dil mardis endamaun, che la disgrazia ei succedida, entochen il venderdis-sera, han ins excavau 16 morts. Mo co satrar tontas baras, cu ins saveva ni purtar ni menar ellas a **Caspausa** e la via anora era serrada e pli prigulusa che mai? La finfinala han ins fulau e cavau via en tut prighel da veta, e lu transportau las baras, tgi zugliai en lenzeuls e tgi mess denter aissas, cargai sin pliras sliusas da maun.

La sonda han ins satrau 19 e la dumengia las davosas 6 baras. Ins po cumprender cun tgei dolor e tristezza els cors dils presents! Cuolms e vals rebattevan dallas lamentaschuns dils zenns ed ils mirs santeri dal bargir e plirar dil pievelun en malencurada. E la ferdaglia era aschi recenta, che las larmas schelavan sin fatscha!

Pader Placi concluda allura sia descripziun cun ils plaids: Vegli po Dieus, il buntadeivel e misericordeivel, emplenir il cor dils concarstgauns cun commiseraziun ed ils habitonts dil vitg cun prudientscha, sina quei ch'ils ins gidien els ed ils auters seresolvien da transportar lur habitaziuns en in liug segir.



**Selva** avon il barschament da 1949. En egl croda si quei mir per liung giusut il vitg. Ei quei stau in mir sco schurmetg encunter la lavina dalla **Val Ruinatsch**?

## 1810 - Vigeli Giusep Valier, niev burgheis

Il Martin Antoni Valier arriva entuorn la mesada dil 18avel tschentaner si da Sursaissa, secasa en Tujetsch e marida l'Anna Maria Liberata Beer. El ei il perdavon da tutta descendenza dils Valiers en Tujetsch. El ha nov affons ed in da quels ei il Vigeli Giusep Valier (1767- ), il sulet cun descendenza. Unanimamein vegn el prius si igl onn 1810 sco burgheis da Tujetsch. Treis puncts formuleschan las cundiziuns e la cunvegna vala per tuts vegnentsuenter.

1846.  
 No 1810. il 26. Nov.  
 Vigeli Giusep Valier en Tujetsch.  
 vegn prius si sco burgheis da Tujetsch.  
 Ei notari e saver entras la presenta brev che sin il sura datum, ei Comparius son publica vischnaunca, il Wagiellj Joseph Wallier e fatg istanza per ils dretgs da vischin da quella, nua che suenter esser fatg il pli u meins ei quel „ein helligameing“ vegnius acceptaus per vischin da nossa vischnaunca cun las sequentas cundiziuns.  
 1. Duet quel esser obligaus da pagar alla vischnaunca la summa de 200 R., dico risculdus duatschien, per la quala summa el duet esser obligaus da segirar cun in sufficient „Underfand“ e tscheinsir annualmein suenter il solit dalla tiara 5 procento, entochen che quei capital seigi buca pagaus giu, ed igl emprem tscheins croda sin s. Martin dil current onn 1810.  
 2. Duet quel esser obligaus da purtar tuttas greveziadas adual in auter vischin da vischnaunca, ei seigi cun lavurs cuminas, taglias etc.  
 3. Duet quel era puder guder tuts emoluments cumins da nossa vischnaunca adual in auter vischin da vischnaunca, senza stuer purtar intgina particulara grevezia.  
 Quels dretgs ein surdai ed accondai ton per igl „Instand“, sco per tut il siu vegnir suenter e per confirmaziun da quei ein suttascrettas domisduas parts e coroborau cun il sigil da nossa vischnaunca  
 En num dalla vischnaunca ils geraus da quella Christian Joseph Wenzin p.t. gerau Giachen Antoni Caviezel a formel sco sura  
 Jeu Vageli Valier confessel sco sisura  
 Il sura document ei sigilaus cul vegl sigil da vischnaunca che mussava **Sogn Vigeli**, il patrun dalla baselgia parochiala, la baselgia dalla val.  
 Inscriziun: **SIGILUM COMUNITATIS ÆTHUATIENSIS**

Anno 1810, ils 26 d'uost en Tujetsch

Ei notari e da saver entras la presenta brev, che sin il sura datum, ei cumparius sin publica vischnaunca, il Wagiellj Joseph Wallier e fatg istanza per ils dretgs da vischin da quella, nua che suenter esser fatg il pli u meins ei quel „ein helligameing“ vegnius acceptaus per vischin da nossa vischnaunca cun las sequentas cundiziuns.

1. Duet quel esser obligaus da pagar alla vischnaunca la summa da 200 R., dico risculdus duatschien, per la quala summa el duet esser obligaus da segirar cun in sufficient „Underfand“ e tscheinsir annualmein suenter il solit dalla tiara 5 procento, entochen che quei capital seigi buca pagaus giu, ed igl emprem tscheins croda sin s. Martin dil current onn 1810.

2. Duet quel esser obligaus da purtar tuttas greveziadas adual in auter vischin da vischnaunca, ei seigi cun

lavurs cuminas, taglias etc.

3. Duet quel era puder guder tuts emoluments cumins da nossa vischnaunca adual in auter vischin da vischnaunca, senza stuer purtar intgina particulara grevezia.

Quels dretgs ein surdai ed accondai ton per igl „Instand“, sco per tut il siu vegnir suenter e per confirmaziun da quei ein suttascrettas domisduas parts e coroborau cun il sigil da nossa vischnaunca

En num dalla vischnaunca ils geraus da quella  
 Christian Joseph Wenzin p.t. gerau  
 Giachen Antoni Caviezel  
 a formel sco sura

Jeu Vageli Valier  
 confessel sco sisura

Il sura document ei sigilaus cul vegl sigil da vischnaunca che mussava **Sogn Vigeli**, il patrun dalla baselgia parochiala, la baselgia dalla val.

Inscriziun: **SIGILUM COMUNITATIS ÆTHUATIENSIS**



## 1811 - Uorden pil temps da stad

*Igl emprem uorden da Tujetsch ch'ei aunc avon maun dumbra 11 artechels. El reglescha il menaschi d'uront il temps da stad. Igl artechel 9 scamonda allas giuvnas/femnas da 14 onns ensi da maner en alps e mises. - La dumengia duei negin purtar buordis, resalvond ina brocca ni brenta enta maun, ni far ora lenna, quei e dapli plaida igl artechel 7. - Quei uorden ei publicaus ella Crestomazia, tom I, igl original ei ius a piarder!*

**Pareri d'in ludeivel obercheit cun ils deputai dils vischinadis sur dils uordens che dueien vegnir fatgs temps da stad, nuncargond ad alp, anno 1811, ils 2 da mars.**

1.mo Eis ei il meini, che naven dils 9 da fenadur entochen sogn Barclamiu (24-08), duei negin puder star cun tiers en ils loghens cheu sunter screts; numnadamein **Cungieri, Valtgeva, Sulprau (Sumprau), Mila, Malamusa, Liez, Mulinatsch, Milez e Scharinas**, quei s'entelli ni caschar ni mulscher, resalvond per untgida da malauras, da neiv e sunter puspei cu la neiv ei naven, sche dueien esser obligai da turnar anavos sunter la neiv. Ed enten tuts sura numnai loghens duei vegnir mess in pindrer, ton la primavera sco la stad. Ei duei era vegnir mess si dubla pindradira sin tiers d'armal e tiers casa.

2.do Duei negin puder midar pli che treis gadas, quei s'entelli cura ch'el va naven dils mises, sche vegn ei quintau l'emprema gada.

3.tio Dueien ils tiers casa esser enferrai da tut temps ed en cass ch'enzatgi negligess, sche duei esser 4 x (*rizzers*) pindradira per gada per tier; quei s'entelli ton sin la pastira sco els praus.

4.to Duei scadin esser obligaus da vegnir a casa cun las cauras da calonda fenadur, u pia che enzatgi savess tener quellas senza donn dil tierz, ton dils praus, sco dalla crappa, tonaton esser obligaus da vischinar a casa.

5.to Dueien ils tiers da mintga vischin buca vegnir sparti, resalvond ils vadials, ils quals mintgin seigi patrun da metter nua ch'el vul ed in per bos duei era puder vegnir tenuu a casa, sco era ina vacca.

6.to Pertuccont ils cavals eisi concludiu, che mintgin duei esser obligaus da metter cun ses tiers, resalvond sch'enzatgi less duvrrar quels per bos a casa, sche dueien quels tals esser obligai da vischinar a casa, duess ei aber esser cavals che vessen pulein, sche dueien ei esser obligai da metter en nuegl tochen ch'ei drovan da trer.

7.mo Pertuccont ils firaus e dumengias eis ei concludiu, che negin duei puder purtar ni far ora lenna, ni purtar buordis, resalvond ina brocca ni brenta enta maun e quei era entelgiu las sondas, ton la primavera sco la stad. Duess ei esser da quels che surfagessen ed enzatgi vesess, sche duei mintgin esser obligaus da purtar la tgisa nua ch'ei s'auda. Gl'ei era entelgiu che negin duei puder ir cun cavals ni per bos cargai sin quels dis.

8.vo Pertuccont igl arvè (*taxa da gudida*) eis ei concludiu che mintgin duei esser obligaus da far duas crenas caschiel per vacca, s'entelli bien caschiel grass e quei duei mintgin ver fatg vigelgia fiasta Nossadunna d'uost (15-08) e treis dis avon vigelgia Sogn Mattiu (21-09) duei mintgin esser obligaus da purtar ensemen en in liug. Negin duei puder far pli pintgas magnuccas che d'otg crenas, e tgi che schass muncar, duei esser obligaus da pagar 30 x per crena. A quels aber che dessen pli ch'il lur, sche duei ei vegnir bonificai cun 18 x per crena.

9.no Eis ei era concludiu che neginas femnas dueien puder maner ellas alps ni mises, ton la primavera sco la stad, quei s'entelli femnas ch'ei sin 13 - 14 onns e leu ensi.



10. Las nuorsas dueien vegnir cargadas calonda fenadur e da leu naven dueien ils uordens dalla stad entscheiver.

11. Ei concludiu che cura ch'igl ei temps da cargar ad alp, sche duei mintgin haver ils dretgs dad ira nua ch'ei mavan, cura ch'ei cargava ad alp, denton buca pli ch'ina gada. Curdond neiv, sche dueien ei era puder vegnir ora giu, mo buca puder turnar enasi tras praus. Duess ei esser enzatgi che surfagess a quels uordens cheu sura screts, sche dueien tals esser sut castitg digl obercheit e vegnir castigai scharfamein.

1811, ils 10 da mars, ein ils sura screts artechels vegni legi giu sin vischnaunca e vegni approbai da quella, resalvond igl emprem artechel ch'ei refusaus; resalvond quei, che tucca tier il metter pindrer, sco era la pindradira fixada etc.

in fede (*en verdad*)

Chrest Joseph Wenzin p. t. genau



**Salins Sura**, dretg il crest **Caschleglia**, davostier ils baghetgs da **Valtgeva Sut** cun el dies il **Cuolm da Vi**; egl ault il **Pez Pardatschas**, seniester la **Val Strem**



**Salins Sura**, davostier la **Val Strem** cul **Witenalpstock**, seniester la pastira da **Camischolas**



**Salins Sut**, dretg la davosa casa da **Salins** cun per liung temps ina scarsinaria. Era mulin e fallun ha l'aua da **Salins** menau onns ora. En scoletta vegneva sco mied d'instrucziun tementau nus affonets cun la stria da **Salins**. Para ch'ei viveva leu d'in temps ina pulitamein nauscha femna che vegneva en general numnada "stria". Enten ira il temps da pastur a **Valtgeva** e passond sper la casa ora, mavan nus buobs, mo oravontut cu jeu fuvel persuls, adina cun pass preschont.



Vesta da **Salins** encunter **Camischolas**

## 1813 - Untgida per Nalps da Magher

Treis onns suenter igl emprend uorden per reglar il temps da buca cargar ad alp, suonda gia la secunda versiun. Igl artechel pertuccont il maner dallas femnas ellas alps e mises ei schaus curdar. Artechel 6 fa attents silla sanctificaziun dalla dumengia ed admonescha, che scadin hagi bein religiun e cunscienza avunda e sesprovi da salvar la lescha da Diu e dalla baselgia. Igl obercheit garegia per cunscienza, che sch'enzatgi vesi surpassaments, quel seigi obligaus d'annunziar quei al ludeivel obercheit. Quei per saver en cass da basegns, curreger, admonir ni castigiar tenor la grevezia dil surpassament.

1813  
16.7.1813 1813 Untgida Nalps  
Essend ils 16 da fenadur anno 1813 stau curdau ina neiv en maniera che las caschadas da Nalps da Magher ein cun lur s.h. vaccas vegnidas ora sin la pastira da Tujetsch e da quei temps alp da pursanavels da Cuolm Cavorgia, ils quals grad eran quei medem di el Plaun Pardatsch a mesiras; vesend quei pia quels, ein ei "sadali" encunter ils cauteguas da Nalps davart lur pass fatgs e nunhavend saviu allura denter els s'entelgir, han pursanavels dil Plaun Pardatsch priu ina s.h. vacca e quella consignau al stalter regent dalla vischnaunca da Tujetsch.

Oz aber, ch'ei ils 17 dil medem, cumparan ils cauteguas e garegian alla buna la s.h. vacca anavos, la quala ei ad els era vegnida extradida cun cundiziun davart ch'els cuntentien il stalter per cuost e breigia e leusunter schau ad els temps da puder haver endamen cun lur pursanavels, sch'els secregien da haver e legalmein possien demonstrar ch'ei hagian en quel dretg dad untgida e nunpudent quei far ver, sche seporschien ei da secunvegnir per la pindradira, ni auter cun la vischnaunca ni pursanavels da Plaun Pardatsch e quei termin ei staus ad els in meins e per confirmaziun da quei han ils cauteguas suttascret.

Essend ils 16 da fenadur anno 1813 stau curdau ina neiv en maniera che las caschadas da Nalps da Magher ein cun lur s.h. vaccas vegnidas ora sin la pastira da Tujetsch e da quei temps alp da pursanavels da Cuolm Cavorgia, ils quals grad eran quei medem di el Plaun Pardatsch a mesiras; vesend quei pia quels, ein ei "sadali" encunter ils cauteguas da Nalps davart lur pass fatgs e nunhavend saviu allura denter els s'entelgir, han pursanavels dil Plaun Pardatsch priu ina s.h. vacca e quella consignau al stalter regent dalla vischnaunca da Tujetsch.

Oz aber, ch'ei ils 17 dil medem, cumparan ils cauteguas e garegian alla buna la s.h. vacca anavos, la quala ei ad els era vegnida extradida cun cundiziun davart ch'els cuntentien il stalter per cuost e breigia e leusunter schau ad els temps da puder haver endamen cun lur pursanavels, sch'els secregien da haver e legalmein possien demonstrar ch'ei hagian en quel dretg dad untgida e nunpudent quei far ver, sche seporschien ei da secunvegnir per la pindradira, ni auter cun la vischnaunca ni pursanavels da Plaun Pardatsch e quei termin ei staus ad els in meins e per confirmaziun da quei han ils cauteguas suttascret.


Gionrest Huonder

Il sura document plaيدا dall'untgida dall'alp Nalps da Magher. Era l'alp Nalps da Grass, che s'auda alla claustra, aveva sia untgida e quella fuva egl Uaul Punt Baselgia. La foto cheu seniester muossa quei uaul che sesanflava exactamein sur la Punt Baselgia che menava dil Run sul Rein e dallas Tarviarsas orasi a Foppas/Surrein e vinavon a Cavorgia (era numnada vi da bara dils da Cavorgia e Surrein).



## 1814 - Uorden da vischnaunca dalla stad

Uorden da vischnaunca dalla stad, fatgs igl onn 1814, ils 15 da zercladur per  
duront il buca cargar ad alp



Pareri d'in ludeivel obercheit d'anno 1814, ils 15 da zercladur, sur dils uordens e secuntener da scadin. Essend concludiu dalla ludeivla vischnaunca da buca cargar ad alp. Tucond tier la stad.

- 1.<sup>mo</sup> Dueien tuts uordens dalla stad haver sia entschatta calonda fenadur.
- 2.<sup>do</sup> En vertit da quei pia dueien las nuorsas sin quei di era vegnir cargadas.
- 3.<sup>tio</sup> Vegn ei proponiu ch'ils cavals duessen vegnir cargai sil **Tgom** sut in pastur, cun la reserva che quels dils cavals possien sesurvir da quels, seigi sco per bos ni per auters basegns e duront quei temps ch'els ein naven dil pastur, possien sesurvir dalla pastira da casa, bein aber seigien ils patruns dils cavals obligai da tener ord donn.
- 4.<sup>to</sup> Tucond tier il far pastur da vaccas e bos da casa ei schau sura a mintga vischinadi.
- 5.<sup>to</sup> Davart ils tiers casa dueien quels esser enferrai da tut temps e duessen ils s.h. tiers casa (*salvanoris*) vegnir pindrai buca enferrai, sche dueien ei ver la pindradira dubla, quei vul dir in baz per gada.
- 6.<sup>to</sup> Pertuccont ils firaus Perbon (*firaus per bonn: cumandai, gebotener Feiertag*), dumengias e firaus da devoziuns, sco las sondas etc. vegn scadin admonius da frequentar ils sogns uffecis e buca negligir quels senza raschuns sufficientas, ed era senuspir da tuttas lavur da quels dis, scumandadas servilas e buca absolut necessaria. Dil reminent eis ei lubiu da puder purtar enqual caussa, latgiras sin quels dis a casa sia, en ina brocca ni brentetta sin maun. In ludeivel obercheit suppona ed ha speronza, che scadin hagi religiun e cunscienza e sesprovi da salvar la lescha da Diu e dalla baselgia encunter speronza, aber sche enzatgi fuss aschi tievis ni forsa aunc aschi schliats da ver pauc ni neginas leschas, seigi dalla baselgia ni divinas, sche vul in ludeivel obercheit a garegiar per cunscienza, che scadin che vesa ni sa da tals che cunterfan a quellas, seigi obligaus da rapportar immediat ad in ludeivel obercheit, sinaquei che quel sappi cuninagada d'in ludeivel obercheit, en cass da basegns, vegnir curregius, admonius ni strufegiaus tenor dalla grevezia surfatga.

7.<sup>tim</sup>o Pertuccont ils donns, seigi cun schar ira per ils praus ils tiers, ni seigi cun far vias novas e senza dretgs, resta a scadin la via aviarta da puder s'indemnisar dil donn pitiu - mo eis ei resalvau, che en cass ch'in che havess pitiu donn u per respect human u per tema da stuer magliar ora ni per autras raschuns buca stgisas, ni less duvrar ils mettels lubi ed usitai per s'indemnisar dil donn pitiu, possi quei tal ni in auter denunziar ad in ludeivel obercheit ni era in ludeivel obercheit schar clamar da sesez il malfatschent per tenor meret, malezia, circumstanzias castigiar quel.

8.<sup>vo</sup> Duei il muvel da scadin restar ensemen, oreifer ils vadials.

9.<sup>no</sup> Las cauras dueien calonda fenadur vegnir a casa sut lur pastur general.

Quests ein pia paucs aber beinmanegiai artechels ch'in ludeivel obercheit cun cussegl dil revendissim segnerfarrer ha anflau da metter avon e proponer alla ludeivla vischnaunca, pertgei che biaras leschas paran schiglioc da buca esser emperneivel, sufficient ei aber a scadin tema da Diu, religiun e cun buna cunscienza.

10.<sup>mo</sup> Ils mises da **Scharinas, Milez, Mulinatsch, Liez, Malamusa, Sur(m)prau, Valtgeva, Cungieri** dueien esser entochen Sogn Barclamiu (24-08) senza caschadas, bein aber dueien ei suenter il sura fixau temps puder leu caschar e pascular las pastiras.

11.<sup>mo</sup> En mintga alp, quei s'entelli da **Maun Sura**, dueien ei ver in pastur general pils s.h. (*salva l'honor*) tiers da casa (*salvanoris*).

**Il sura document ei en dubel avon maun. Alla fin dil secund sesanfla aunc la suandonta remarca:**

Pertuccont igl arvè anfluss'ins, essend che quel vegn pagaus cun daners, da metter si tschun bazs per vaccas schetgas e bletschas, excepidas fussen da quei pagar quellas che pagan igl arvè, sco era quellas da quels vitgs che han buca envernau. La raschun da quei project ei, che la vischnaunca sin d'atun, ils sequents nunprovedi deivets ch'ei alla claustra senza la remessa 200 fl., il muser 90 fl., a mistral Cagienard capital 40 fl. e la questiun dil Stiafen pigurer ch'ei era leu pendent e forsa aunc deivet da cumin. Tgei la vischnaunca ha da trer en sa ella sezza.



Salvanori/piertg, dretg davostier **Tschamut** cul Hotel Rheinquelle, ella cavorgia ramura il giuven **Rein Anteriur**.

## 1815 - 1860 Rodel digl arvè claustral

La copia dil rodel dils tscheins per las alps Val Val e Val Giuv muossa co il tscheins ei vegnius pagaus denter 1815 e 1861, igl onn che la vischnaunca ha cumprau las duas alps dalla claustra da Mustér.

- 1817 pagau cun 200 flurins

- 1825 cun caschiel

- 1858 tscheinsiu

- 1861 cumprau ora pil capital da 7650 frs.

Cugl onn 1861 han las davosas restonzas feudalas priu ina fin ella Val Tujetsch!

Alpschaff

mit dem Armgig - Zins - Rodel  
im Jochgauriff Dischalis  
1812.

Seite 51.

! im letzten Heft !

Waldschaff

Wald - e Walgauriff & Zinsauszahlung und  
gütliche Aufzahlung Fiskus Kassa K. 600

1815 mit Geldauszahlung. 1816 mit / 200.

gezahlt. 1817 mit / 200: bezahlte 1818.

und nicht weniger (Montagszahlung) mit / 200  
bezahlt.

1819. 820 et 1821 gezahlt. 1822 gezahlt.

1823 gezahlt und eben 1824 gez.

gezahlt und eb. 1825 gezahlt mit Kassa.

1826 gez. 1827 gez. 1828 gez. 1829 gez.

1830 gezahlt 1831 gez. 1832. 1833. 1834 gezahlt.

1835 gezahlt. 1836 gezahlt 1837 et 1838 et

gezahlt mit / 1839 - 1840 gezahlt 1841 gezahlt.

1842 et 1843 gezahlt 1844 et. gezahlt 1845 et

bis an 1856 inclusive mit Geld ausbezahlt.

1857 gezahlt. 1858 gezahlt. 1859 et.

1860 gezahlt. Dieser Kassa wurde 1861

den 21 März gezahlt ein Capital fr 7650

abgezahlt.

B. Di lassen 3 Zinsen an: 1860 gezahlt und et  
für m. P. Marten Adreoli, mit et pfand, geschrieben